

# Nelayan gesa 'halalkan' aktiviti tangkapan siput retak seribu

UM 8/3/2023 MS:29

## EKSKLUSIF

Oleh MOHD. HAFIZ  
ABD. MUTALIB

hafiz.mutalib@mediamulia.com.my

**KANGAR:** Hasil daripada kegiatan menangguk siput retak seribu oleh nelayan negeri ini di perairan Kuala Perlis di sini mampu mencecah sehingga 40 sehingga 50 tan metrik dengan nilai mencecah RM75,000 sehari atau RM2.25 juta dalam tempoh sebulan.

Jika setahun, nilai hasil tangkapan dikatakan boleh mencecah sehingga RM27 juta di sebalik aktiviti penangkapan siput tersebut di haramkan oleh Jabatan Perikanan.

Justeru, kira-kira 200 nelayan di negeri ini menggesa agar Jabatan Perikanan 'menghalalkan' aktiviti tersebut atau sekurang-kurangnya mengeluarkan permit kepada mereka bagi melakukan kegiatan berkenaan di sebalik hasil laut seperti ikan, udang, ketam dan sebagainya yang semakin merosot.

Dalam masa sama, mereka juga meminta kerajaan negeri campur tangan dan menjadi pengantara dengan Jabatan Perikanan agar ak-



**NELAYAN** mengasingkan hasil tangkapan siput retak seribu yang mampu menjana pendapatan di sebalik hasil laut seperti ikan yang semakin berkurangan di Kuala Perlis semalam. -UTUSAN/MOHD. HAFIZ ABD. MUTALIB

tiviti tersebut dibenarkan sekali gus membantu nelayan menjana pendapatan tanpa perlu berasa takut dikenakan tindakan atau hasil berkenaan dirampas oleh pihak berkuasa.

Bercakap kepada *Utusan Malaysia*, seorang nelayan, Mohd.

Azhad Mohd. Asyraf, 51, berkata, sehari, dalam tempoh dua atau tiga jam, dia mampu memperoleh hasil tangkapan sehingga 700 kilogram siput retak seribu.

Katanya yang sudah lebih 30 tahun sebagai nelayan di sini, harga siput berkenaan dijual sekitar

RM1.50 sekilogram dengan pendapatan pula lebih RM700 sehari.

Selain itu, katanya, penduduk setempat juga boleh menjana pendapatan dengan mengambil upah untuk kerja-kerja mengasingkan siput ini.

"Pihak Jabatan Perikanan per-

lu melihat aktiviti tersebut dalam aspek positif dengan tidak lagi mengharamkan tangkapan tersebut. Jika tidak mengeluarkan lesen sekali pun, mereka boleh mengeluarkan permit kepada nelayan-nelayan ini menangkap siput tersebut atau mengenakan syarat-syarat tertentu.

"Selain itu, mereka (pihabatan) juga boleh melaksanakan prosedur-prosedur tertentu untuk aktiviti penangkapan siput ini seperti penjadualan tangkapan, kawasan atau zon tertentu dan sebagainya.

"Jika melaksanakan tindakan penguatkuasaan sekali pun, para nelayan tetap juga menangkap siput ini kerana ia mampu membantu menjana pendapatan kami ketika hasil laut seperti ikan sudah semakin berkurangan sejak kebelakangan ini," katanya.

Seorang lagi nelayan, Mohd. Ropi Ali, 48, berkata, kebanyakan nelayan ketika ini sudah beralih kepada aktiviti tangkapan siput memandang hasil laut seperti ikan, ketam, udang dan sotong sudah berkurangan.

Katanya, Jabatan Perikanan perlu mengkaji semula pengharaman tangkapan siput retak seribu itu memandang dalam tempoh tertentu siput berkenaan juga akan mati.

## 'Sampai bila biar nelayan cari rezeki dalam ketakutan'

**KANGAR:** Kerajaan negeri diminta campur tangan dan berbincang dengan Jabatan Perikanan bagi mencari jalan membenarkan nelayan negeri ini mencari rezeki menangguk siput retak seribu di perairan Kuala Perlis di sini.

Ahli Dewan Undangan Negeri (ADUN) Kuala Perlis, Abu Bakar Hamzah berkata, sampai bila mahu dibiarkan nelayan sentiasa berada dalam ketakutan setiap kali melakukan aktiviti tersebut bagi menjana pendapatan harian.

Katanya, beliau juga akan memanjangkan isu berkenaan kepada kerajaan negeri agar satu kaedah terbaik dicapai dalam membantu nelayan-nelayan di Kuala Perlis ini.

"Kita cadangkan agar pihak berkaitan kaji balik sama ada memberikan permit kepada nelayan-nelayan melakukan aktiviti menangguk siput atau melaksanakan tangkapan berjadual.

"Jika tidak benarkan nelayan ini tangkap (siput) sekali pun, orang luar (nelayan luar) tetap datang menceroob menangkap siput ini. Sebaik-baiknya benarkan nelayan negeri ini menangkap siput di perairan Kuala Perlis ini.

"Sampai bila nak biar nelayan berada dalam ketakutan setiap kali keluar menangguk siput ini sedangkan mereka mencari rezeki," katanya kepada *Utusan Malaysia* selepas mengadakan pertemuan bersama nelayan di

Kampung Tanah Baru, Kuala Perlis di sini, semalam.

Dalam pertemuan bersama kira-kira 100 nelayan itu, mereka juga mengesakan agar Jabatan Perikanan membenarkan aktiviti menangguk siput retak seribu di perairan Kuala Perlis ini.

Tambah Abu Bakar, beliau akan terus membawa isu berkaitan nasib nelayan Kuala Perlis ini dalam sesi sidang Dewan Undangan Negeri (DUN) pertengahan Mac depan bagi mendapat perhatian daripada kerajaan negeri.

Katanya, isu berkenaan bukan perkara baharu sebaliknya sudah lama berlarutan yang sepatutnya diberikan perhatian dalam membela nasib nelayan di Kuala Perlis.



**ABU Bakar Hamzah** (kanan, berdiri) mengadakan pertemuan bersama para nelayan yang menggesa aktiviti menangkap siput retak seribu dibenarkan di Kampung Tanah Baru, Kuala Perlis, Kangar, semalam.